



Pesakit sekat maklumat

KUALA LUMPUR: Halangan komunikasi di antara doktor swasta dan pejabat kesihatan daerah, serta kos rawatan pemeriksaan demam denggi yang tinggi didapati antara punca kegagalan aktiviti pencegahan wabak itu di negara ini.

Persatuan Perubatan Malaysia (MMA) mengakui terdapat kelemahan dalam penyaluran maklumat mengenai kes denggi oleh doktor swasta kepada Jabatan Kesihatan seperti yang dikatakan Ketua Pengarah Kesihatan, Tan Sri Dr Mohd Ismail Merican, dalam laporan akhbar semalam.

Bagaimanapun, persatuan yang mempunyai lebih 8,000 keahlian itu mengatakan ia berlaku bukan disebabkan doktor enggan membuat laporan berkenaan.

Sebaliknya, kata Presiden MMA Dr David Quek Kwang Leng, terdapat pesakit yang tidak membuat pemeriksaan denggi disebabkan kos mahal.

“Ada pesakit yang demam datang kepada doktor (swasta) dan kemudian dinasihat untuk membuat pemeriksaan denggi tetapi mereka enggan.

“Masalah menjadi lebih rumit apabila pesakit berkenaan pergi pula mendapatkan rawatan demam biasa daripada doktor di klinik lain selepas mendapati demam mereka berpanjangan.

“Ia untuk mengelak daripada dirawat sebagai pesakit denggi sebab kos tadi. Padahal rekod awalnya berada dalam tangan doktor yang mula-mula pesakit itu temui. Namun perkara sama (enggan dirawat pesakit denggi) tetap berlaku,” katanya ketika dihubungi di sini, semalam.

Namun, Dr David tidak menyatakan kos rawatan pemeriksaan demam denggi di klinik atau hospital swasta.

Harian Metro semalam melaporkan mengenai kekecewaan Dr Ismail berikutan sikap pengamal perubatan gagal memaklumkan kes denggi kepada pejabat kesihatan hingga menyumbang kesukaran pihak jabatan melaksanakan aktiviti pencegahan denggi.

Laporan memetik, Dr Ismail turut meluahkan rasa tidak puas hati berikutan hanya sembilan peratus daripada 21,707 kes yang dilaporkan sepanjang tahun ini dimaklumkan kepada pejabat kesihatan daerah terutama oleh klinik primer (swasta).

Presiden Persatuan Perubatan Doktor Utama Malaysia (Pcdom), Dr Molly Cheah pula berkata halangan komunikasi antara doktor dengan Jabatan Kesihatan bukan perkara baru.

“Masalah penyaluran maklumat ini adalah kesinambungan yang berlaku lebih 30 tahun lalu sejak saya

mula bekerja sebagai doktor.

“Apabila doktor cuba menghubungi jabatan, kerap terjadi talian sibuk. Justeru, saya cadangkan pengamal perubatan (doktor) dan jabatan mengadakan pertemuan mencari titik penyelesaian masalah komunikasi,” katanya.

Menurutnya, dalam pertemuan itu kelak mungkin timbul beberapa cadangan dan idea boleh dilaksanakan termasuk mewujudkan hotline khas untuk demam denggi.

Hubungi bahagian pengiklanan kami untuk tujuan pengiklanan dan tajaan di dalam Harian Metro Online .
© Hak cipta terpelihara 2007 The New Straits Times Press (M) Berhad